

INTERIORIDADE: FUNDAMENTU ESPIRITUALIDADE NIAN

Iha sakrestia Kreda konventu ruma nian, iha lavabo atu amlulik sira fase liman molok selebrasaun Misa nian, ita haree kartela ne'ebé hakerek "NISI LAVERIS INTUS", katak: se ó la fase interiormente la serve buat ida atu ó fase liman sira. Liafuan sira-ne'e hatudu perigu boot atu haketak vida esteríór husi vida interiór.

Problema ne'ebé mosu mak iluzaun atu moris vida espirituál ida bazeia de'it ba esterioridade. Ida-ne'e mak perigu formalizmu no legalizmu nian. Relijiaun legalista no formalista preokupa de'it kona-ba komportamentu di'ak eh aat husi pontudevista esteríór, hodi halo no hakbarak norma no regulamentu sira. Ema konfunde vizibilidade ho protagonizmu, orasaun ho devosionizmu, lialoos ho dogmatizmu, Evanjelu ne'ebé falun metin/enkaixa tiha iha dixiplina formál.

Insektu ne'ebé tohi vida espirituál nia abut mak ipokrizia (laran makerek), katak deformasaun entre ko'alia no halo, entre aparénsia no "ser", entre esteríór no interiór, hatudu ba ema seluk buat ne'ebé ita la'ós. *"Sira halo buat hotu atu ema haree"* nune'e ema sira ne'ebé hakribi salan, halo orasaun no fó ezmola simu ona sira-nia rekompensa maibé dook husi Aman ne'ebé haree iha segredu (Mt 6, 1-6.16-18).

Eskritura nakonu ho Na'i nia lamentasaun liuhusi profeta sira nia ibun: *"Povu ida-ne'e hana'i ha'u ho ibun tutun maibé sira nia fuan dook husi ha'u". "Lees imi-nia fuan, la'ós imi-nia hatais"*.

Maski nune'e ita tenke iha atensaun atu la monu iha erru kontráriu katak intimizmu nu'udar esesu interioridade nian, taka iha an rasik, ne'ebé esklui manifestasaun esteríór. Dalaruma ita tenke halo soldadura (hahalok solda nian) esensiál entre vida interiór no esteríór, entre vida naturál no sobrenaturál, entre ema isin nian no ema espirituál, entre klamar no isin, entre matéria no espíritu atu deskobre ema iha ninia totalidade.

Dalaruma iha Kreda ita haree fiar-na'in ne'ebé haketak an husi nia an nu'udar ema, sasin Maromak nian haketak an husi umanu; ema ne'ebé partisipa iha Eukaristia maibé haketak an husi eziyénsia justisa nian; ema ne'ebé obedese haketak an husi konxiénsia rasik.

Paulo iha ninia surat ba sarani sira iha Corinto hatudu momoos kompozisaun duál ema nian ho ninia forsa no limite sira, maibé laho separasaun eh ezklusaun: *"Sé mak hatene ema nia segredu se la'ós ema nia espíritu ne'ebé iha nia? ...Ita la simu espíritu mundu nian, maibé Maromak nia Espíritu atu hatene buat hotu Maromak haraik mai ita... Buat sira ne'e hotu ami ko'alia sai, la'ós ho linguajen ida mai husi matenek ema nian, maibé Espíritu mak hanorin, hodi esprime sasán espirituál ho liafuan espirituál. Maibé ema naturál la komprende sasán sira Espíritu Maromak nian; basá ba nia buat sira-ne'e mesak bulak, no nia la iha kbiit atu komprende sira, tanba bele julga de'it liuhusi Espíritu. Ema espirituál fali julga buat hotu no ema seluk labele julga nia"* (1Cor 2, 11-18). *"To'ó oras-*

ne'e ha'u labele ko'alia ba imi nu'udar ema espírituál, maibé nu'udar ema isin nian... basá imi sei ema isin nian tanba iha imi-nia leet sei iha laran-moras, fahe malu; imi la'ós ema isin nian hodi moris hanesan ema baibain?" (1Cor 3,1-3).

Bento XVI iha ninia ensíklika "Deus Caritas Est" n. 5 hateten: *"Ema sai ninia an rasik loos bainhira klamar no isin hela iha unidade íntima. Se ema buka sai de'it espíritu, no hewai isin nu'udar liman-rohan animál nian, entaun espíritu no isin lakon sira-nia dignidade. No se, husi parte seluk, nia hakribi espíritu no konsidera matéria, isin, nu'udar realidade ezkluziva, nia lakon mós ninia grandeza. La'ós espíritu, la'ós mós isin mak hadomi, maibé ema, ema mak hadomi nu'udar kriatura unitária ida iha ne'ebé isin no klamar halo parte".*

Konformasaun ho Kristu

Fiar sarani sempre konsidera ema nu'udar uni-duál iha ne'ebé matéria no espíritu horik hamutuk.

"Maromak hili nanis ita atu sai tuir nia Oan-Mane nia ilas".

Konformasaun ne'ebé ita simu bolun la'ós de'it imitasaun ba Kristu ne'ebé haraik-an, pasiente, di'ak, laran-sadia... maibé atu sai hanesan Nia liuhusi sakramentu sira, sinál grasa nian maibé mós prodús iha ita buat ne'ebé sakramentu signifika.

Batizmu mak sakramentu ne'ebé halo ita sai isin ida ho Kristu Jezús, halakon iha ita salan orijinál. Batizmu, hanesan sakramentu seluk, prodús mudansa ontolójika iha ita, katak muda ita nia an nia estrutura, nune'e ita la'ós tan ema uluk nian, molok no depoizde batizmu, maski iha li'ur haree hanesan de'it. Hanesan iha sakramentu Eukaristia paun no tua ita haree hanesan maibé, liutiha konsagrasaun, paun la'ós ona paun maibé Kristu nia Isin, no tua lalós ona tua maibé Kristu nia Raan. Ho Batizmu ema nia oan sai Maromak nia Oan.

Konformasaun ho Kristu la'ós de'it iha planu morál, nu'udar empeñu sarani, maibé iha planu ontolójiku tanba ne'e buat hotu ne'ebé ita dehan no fiar kona-ba Kristu, ita dehan nu'udar ema sarani.

Ita halo paralelu kona-ba realidade rua:

Jezús: Maromak nia Oan, ho Inkarnasaun, sai mós "ema nia Oan" nune'e Nia mak Maromak loos no ema loos.

Ita: ema nia oan, ho Batizmu sai "Maromak nia Oan" nune'e ema loos tuir natureza no Maromak nia oan tanba grasa "no ita Maromak oan loos duni", apóstolu João aseguira.

Jesús: ema ida ho natureza rua, ida divina no ida umana.

Ita: ema ida ho natureza rua: umana no divina: *"hola parte iha natureza divina".*

Jezús: Ninia hahalok mak hahalok ema nian: ko'alia, la'o, kole, terus, nst ... maibé mós hahalok Maromak nian: nia halo milagre sira, perdua salan sira, nst...

Ita: Ita-nia atividade materiál no intelektuál hotu umana, maibé ita mós iha kbiit atu halo hahalok Maromak nian: "*ema ida labele dehan Jezús mak Na'i se la'ós hodi Espíritu Santu nia kbiit*" no bainhira ita realiza hahalok liuhusi virtude teologál fiar, esperansa no karidade nian.

Nune'e ema sarani ida mak ema isin nian no ema espíritu nian; nia iha vida naturál ida no vida sobrenaturál ida; dimensaun materiál ida no dimensaun espírituál ida.

Ita tenke tau matan ba dimensaun rua ne'e hotu no tau sira rua iha armonia, hanesan ita-nia espiritualidade mós husu atu inkarna espiritualidade, sai Marta no Maria, moris vida anju sira-nian no vida apóstolu sira-nian.